

Students grischuns a las universitads europeicas

■ **Sco universitads (era: scolos autas) vegnan designadas oz instituziuns da furmazion dal stgalim superiur u terziar. Ultra da las universitads cumpiglia questa noziun era las duas scolos autas tecnicas federalas.** Fin il 1800 han era las academies ed ils collegis, en ils quals vegnivan instruids ils plevons grischuns, gi in funcziun universitara; en il 19avel tschientaner èn quels alura vegnids reunids ad universitads (p.ex. Turitg il 1833). Curs da basa universitars e preparandas porschevan era singuls gimnasis da gesuits. Il Grischun n'ha betg disponi d'ina universitad fin a la fundaziun da la Scol'auta da teologia Cuir il 1968. Entant èn s'establids a Cuir la Scol'auta da tecnica ed arquitectura (dapi il 1998) respectivamain la Scol'auta da tecnica ed economia (dapi il 2000) e la Scol'auta da pedagogia dal Grischun (dapi il 2003, successura da l'anteriur Seminar scolastic) che n'èn dentant betg «universitads» en il senn tradiziun dal pled.

Las elites grischunas dal stadi e da la baselgia èn sa laschadas scolar fin lunsch sur il 1850 ora surtut a Turitg ed a Basilea – avant il 1800 50 % da tut ils students reformads dal Grischun – sco era ad universitads tudestgas e (pli paucs) ad universitads talianas e franzosas. Ils students grischuns immatriculads en gimnasis ed academies derivavan da tut las classas socialas (qua tras eran garantidas las clamadas spiritualas), entant ch'ils students a las universitad eran fin viaden il 19avel tschientaner surtut figls da la signuria.

La preschientscha da students (e professers) grischuns a las universitads da la Svizra e da l'exteriur è perscrutada mo punctualmain e per tschertas periodas.

Las universitads svizras

A l'Universitad da Basilea (fundada il 1460) chattain nus oravant tut students da medischna e teologs reformads, ma era giurists. Dals 169 students grischuns inscrits en il 16avel tschientaner en questa universitad derivavan 103 da l'Engiadina, ed era en il 17avel tschientaner faschevan ils Engiadinais, ensemen cun commilitons dal Puschlav e da la Val d'Alvra, dapli che la mesadad dals students grischuns a Basilea. Ils biers eran figls da nobels e da plevons.

L'Universitad da Berna (fundada il 1834) ha gudagnà impurtanza per ils students grischuns pir en il decurs dal 20avel tschientaner.

L'Universitad da Friburg (fundada il 1889 sco universitad catolica) è stada da bell'entschatta in center da students catolics e rumantschs, oravant tut dapi l'instituziun da la professura da rumantsch il 1957. Il semester d'enviern 2005/06 eran immatriculads là 104 students e 139 studentas dal Grischun.

L'Universitad da Geneva (fundada il 1559) ha giugà en il 16avel tschientaner ina rolla sco lieu da studi per teologs reformads: tranter il 1563 ed il 1580 chattain nus qua 16, en il 17avel tschientaner 55 students, la mesadad da quels derivavan da la signuria. Geneva offrà actualmain era ina professura titulara da rumantsch.

L'Universitad da S. Gagl (averta il 1899), nua ch'ins sa studegiar economia, giurisprudenza e scienzas socialas, ha adina giugà ina rolla (dal punct da vista quantitativ) plitost modesta per ils Grischuns.

A la Scola da latin e da teologia a Turitg eran inscrits dal 1534–60 247 Grischuns, e l'Universitad da Turitg (fundada il 1833 tras cumpilaziun da sias anteriuras scolos autas da teologia, giurisprudenza e medischna) partiva cun Basilea la pli part dals students grischuns. Il Politecnicum da Turitg (fundà il 1855, dapi il 1911 Scola politecnica federala) era a l'entschatta en la sumbriva da l'universitad, essend il Grischun sco chantun senza industrialisaziun nunattractiv per specialists sin il champ da la tecnica e da la



L'Universitad da Minca enturn il 1900.

scienza natirala. Correspondentamain pitschen è stà fin avant paucs decenniis il dumber dals students grischuns a la Scola politecnica federala. Il 1985 ha l'Universitad da Turitg installà ina professura extraordinaria per rumantsch (vacanta dal 1996–2001), e la Scola politecnica federala ha mantegnì ina tala en ils onns 1983–97. Il 2008 eran inscrits 25 students da rumantsch (tuts sco rom lateral).

Sper las universitads èn stads ils collegis dals gesuits (Lucerna, Soloturn, Friburg, Pruntrut, Sion) dapi ca. il 1600 da grond'impurtanza per la giuventetgna catolica, surtut pervia da lur purschida parziala da curs da basa universitars e da preparandas, per exempel en teologia e filosofia. La finamira e las metodus dal stgalim gimnasil bass e mesaun eran per gronda part las medemas sco en ils gimnasis a Turitg ed a S. Gagl, frequentads principalmain dals Grischuns reformads. Ils collegis dals gesuits han alura era introduci pass per pass ils «studia superiora», e gia en la mesadad dal 17avel tschientaner disponiva Lucerna d'ina facultad filosofica e teologica cumpletamain sviluppada (universitad dapi il 1985). Ils students da teologia dal Grischun frequentavan surtut ils collegis dals gesuits a Lucerna ed a Friburg.

Las universitads a l'exteriur

Germania

Las universitads en Germania han pers generalmain lur impurtanza suenter la fundaziun da pliras universitads svizas en il 19avel tschientaner. La pli part dals anteriurs studis a temp cumplain purschids a l'exteriur èn sa reduccs en il 20avel tschientaner ad insaquants paucs semesters.

Al Collegi apostolic dals gesuits a Dillingen (fundà il 1610) possedeava l'uestgieu da Cuir fin il 1803 quatter fin otg plazzas da studi. Quest collegi offriva sper il gimnasi era in curs da teologia da dus onns ch'è vegni frequentà dal 1620–1777 da 53 Grischuns (rodel incumplet). A Friburg e.Br. (avert il 1460) han studegià dal 1460–1806 72 Grischuns (da quels 32 dal 1470–1520), la pli part teologia. A partir da la reformaziun èn ils reformads guntgids a Basilea, ed era da vart catolica èn documentads per il 17avel–18avel tschientaner mo 19 students (rodel incumplet). Dal 1807–1914 han studegià là 29 Grischuns (15 medischna, tschintg filosofia resp. giurisprudenza, quatter teologia).

L'Universitad da Halle (averta il 1693) ha attratg sco center da l'illum-

nism tempri e dal pietissem numerus students svizzers: dals 196 immatriculads fin il 1806 a Halle eran 20 dal Grischun, en emprima lingia giurists, suandads da mediciners e teologs. Dal pietist da Halle, August Hermann Francke, è vegnida l'itimaziun da fundar chasas d'orfens a Tusaun, e Johann Peter Neseemann, scolà a Halle, ha manà cun Ulysses von Salis il Filantropin a Marschlins.

En il 19avel tschientaner èn sa reduccs ils contacts. Heidelberg (la pli veglia universitad da la Germania, fundada il 1386) è stà in dals centers principals da l'umanissem en il 15avel e 16avel tschientaner cun ina gronda irradiaziun sin la Svizra. Tranter il 1449 ed il 1518 han studegià là 18 Grischuns, la pli part teologia. A partir dal 1459 è quell'universitad entrada (per Svizzers) en concorrenza cun Basilea. Suentar il 1560 è Heidelberg alura daventà in center da la teologia protestanta cun contacts intensivs cun la Svizra reformada («Catechissem da Heidelberg» dal 1563, «Segunda Confessiun helvetica» dal 1566). Dal 1619–56 n'èn attestads nagins Grischuns a Heidelberg, e dal 1622–56 è l'universitad stada serrada ed ha alura giugà ina rolla marginala per students grischuns. Tranter il 1803 ed il 1914 è documentads 211 Grischuns a Heidelberg. Dals 235 students grischuns inscrits dal 1656–1914 studegiavan 120 giurisprudenza, 63 teologia, 33 medischna, trais scienzas naturalas e 16 eran immatriculads a la facultad filosofica; la pli part derivava da la signuria e fitg biers da l'Engiadina (oravant tut teologs).

A l'Universitad dad Ingolstadt (fundada il 1459) han ils students grischuns (oravant tut Engiadinais) la pli auta frequentza en il 16avel tschientaner. En il 17avel tschientaner è quell'universitad daventada (sut la dominanza dals gesuits) ina scola d'elita per la reforma respectivamain la cuntrareforma catolica. La gronda part dals 79 students dal Grischun eran figls da la signuria catolica (biers da las familias puschlavinas de Bassus). Il 1800 è l'Universitad dad Ingolstadt vegnida transferida a Landshut ed il 1826 a Minca.

A l'Universitad luterana da Jena (fundada il 1558) han studegià Grischuns oravant tut en il 19avel tschientaner intgins semesters dretg e criminalistica.

L'Universitad da Minca, fundada il 1826 sco successura dad Ingolstadt, è stada fin il 1848 in center da la restauraziun catolica en Germania ed ha influenzà fermamain ils circuls conservativs da la Svizra catolica. Attratgs da professers

sco il publicist Joseph von Görres (1776–1848) e l'istoricher ecclesiastic Ignaz von Döllinger (1799–1890) han numerus Svizzers, oravant tut catolics, absolvi studis da teologia, istorgia u dretg (studis entirs u parzialis) a quell'universitad. Tras ses students Giacun Hasper Muoth e Caspar Decurtins è ella daventada spezialmain impurtanta per la renaschientscha retorumantscha. A Minca han però era studegià numerus medis grischuns. Dals parlamentar grischuns engaschads a Berna tranter il 1848 ed il 1920 avevan studegià 24 a Minca, tranter quels era il protestant Felix Calonder, il posteriur cusseglier federal.

L'anteriura Academia da Strassburg (fundada il 1567) è vegnida trasformada il 1621 en in'universitad (schliada il 1794). Strassburg appartegneva dapi il 1681 al territori franzos, l'universitad ha dentant mantegnì, cun excepziun da la facultad da dretg, ses caracter tudestg e protestant. Dapi il 1621 han studegià là 55 Grischuns, da quels 24 da Cuir (rodel incumplet): 21 medischna, 19 giurisprudenza, tschintg filosofia respectivamain teologia.

L'Universitad da Tubinga (averta il 1477) è stada in center da l'umanissem ed in dals lieus da studi ils pli impurtants fin en il 18avel tschientaner; en il 19avel tschientaner è ella era stada la sedia da la «Scola da Tubinga», in institut per teologs evangelics e catolics cun ina metoda istoric-critica radicala. Avant il 1800 èn documentads mo paucs Grischuns a Tubinga. Tranter il 1800 ed il 1914 eran immatriculads 125 students, tranter auter 72 teologs evangelics e trais catolics, 27 medis e 19 giurists.

Austria

A Feldkirch, che appartegneva a l'uestgieu da Cuir, è vegni fundà il 1649 il collegi dals gesuits. La claustra da chaputschins (fundada il 1605) ed il gimnasi dals gesuits han giugà ina rolla impurtanta en la cuntrareforma grischuna. Il gimnasi vegniva sustegni dals uestgs da Cuir cun ina contribuziun annuala e frequentà regularmain da Grischuns: 1650–1773 124 (ultra da numerus Grischuns betg registrads), 1777–1870 128 (tranter quels fitg biers da la classa dirigente catolica). L'emprova d'installar il 1773 in seminari da spirituals per l'uestgieu da Cuir n'è betg reussida.

L'Universitad da Puntina (fundada il 1668) è stada en il 18avel tschientaner in lieu da furmazion impurtant per l'entira svizra catolica: dal 1671–1900 èn documentads qua radund 1100 students catolics, tranter quels 120 dal Grischun. Il 1874 han quels perfin fundà in'unioni

studentica a Puntina. A la professura da romanistica, instituida da Theodor Gartner il 1899, han ils Rumantschs d'engraziar perscrutaziuns impurtantas. Dapi il 1965 exista qua in lectorat rumantsch e dapi il 1972 ina partiziun da retoromanistica.

L'Universitad da Vienna è stada oravant tut in lieu da studi per teologs. Dals 112 students grischuns attestads en il 15avel e 16avel tschientaner (rodel incumplet) èn biers daventads pli tard plevons e/u notars. Il 1627 ha il papa Urban VIII concedi a students «da la Rezia» duas plazzas da studi (abolidas il 1753) cun pensiu libra en il Collegi da S. Barbara. Cun mo 23 students (malgrà las duas plazzas libras) è la frequentza stada modesta en il 17avel tschientaner.

Italia

L'Universitad da Bologna (fundada vers la fin dal 11avel tschientaner) ha giugà, ensemen cun Pavia (fundada il 1361) ina rolla mo fin viaden il 16avel tschientaner, e quai sco lieu da studis giuridics ed umanistics.

A l'Universitad da Milaun è vegni fundà il 1579 en il rom da la reforma catolica il Collegium Helveticum per il clerus da la Svizra e dal Grischun. Fin il 1797 èn vegnids scolads là ca. 400 spirituals grischuns, tranter il 1842 ed il 1900 51.

A l'Universitad da Padua (fundada il 1222) han studegià tranter il 1530 ed il 1620 111 Grischuns. Quest'universitad ha giudi ina gronda popularitad era en il 17avel tschientaner, avend pudì sa strair sco universitad sut la suveranità veneziana a la pressiuon excessiva da la reforma tridentina (davent da Milaun). Tranter ils students grischuns inscrits qua dal 16avel–18avel tschientaner predominavan ils figls da la signuria (80 %, fitg biers Salis) e sco rom da studi la giurisprudenza (96 dals 136 students en il 16avel–18avel tschientaner). Padua era l'unica universitad taliana, nua ch'ins pudeva sa scolar en lingua taliana en giurisprudenza ed administraziun, quai ch'è stà fin il 1797 da grond avantatg per aspirants ad uffizis en Vuclina.

A Roma sa chatta dapi il 1552 il Collegium Germanicum ch'ha concedi il 1637 a l'uestgieu da Cuir duas plazzas da studi libras. En quest institut han studegià fin il 1920 tut en tut 42 Grischuns u students daventads impurtants per il Grischun. Al Collegium de Propaganda Fide (fundà il 1633) han studegià fin il 1920 ca. 35 Grischuns catolics.

Frantscha

Per l'Universitad da Paris (fundada a l'entschatta dal 13avel tschientaner) n'existan (anc) naginas datas, ella è dentant stada per temps detg impurtanta per il Grischun, essend che la Republica possedeava là tranter il 1582 ed il 1785 duas plazzas da studi libras per Lia – ils babs prestavan servetsch mercenar al retg franzos, ils figls pudevan studegiar a Paris. A l'entschatta na vegniva questa quota betg adina accordada u sfruttada effectivamain. Stipendis per studis a Paris concediva era la Lia da la Chadé. Il retg franzos era interessà da scolar giuvs Grischuns en lingua franzosa per che quels possian alura servir ad el sco uffiziers u diplomats (u interpreters per tals); fin il 1700 è el vegni concorrenza en ses intent dals stipendis spagnols accordads a Grischuns a Milaun.

Adolf Collenberg

Lexicon Istoric Retic

Il LIR cumpiglia bundant 3100 artgels (geografics, tematics, artitgels da familias e biografias) davart l'istorgia grischuna/retica e la Rumantschia. Editura: Fundaziun Lexicon Istoric Svizzer; versiun online: www.e-lir.ch; versiun stampada: www.casanova.ch u en mintga libreria.